

Harrijasotzea

Goenatxok aurkari gehiago

Euskal Herriko Txapelketa jokatu da gaur Iruñean (12:00)

Bost harrijasotzailereren artean erabakiko da aurtengo harri handietako txapela: Goenatxo, Zelai, Ostolaza, Goikoetxea eta Telleria. Ohi bezala, lau harri erabiliko dituzte eta bakoitzarekin hiruna minutuko txandak egingo dituzte. Iazkoarekin alderatuta, aurten 25 kilo gutxiago izango du harri bakoitzak. Azken zazpi urteotako txapelduna Goenatxo izan da.

HARRIJASOTZAILEEN EZAUGARRIAK						
	soietakua	adina	pisua	garaiera	lorpen nagusiak	aurkari indartsuena
Goenatxo	Azkoitia	38	126	1.80	Harri handiekin 7 aldiz Euskal Herriko txapelduna eta marka ugari	150 kiloetako kuboa, Zelai
Zelai	Mallabia	40	104	1.75	Harri txikiekin 14 aldiz Euskal Herriko txapelduna eta marka ugari	175 kiloetako zilindroa, Goenatxo
Ostolaza	Zestoa	25	107	1.75	Harri handietako txapeldunordea 3 aldiz eta kinttopekoetan 2 aldiz txapelduna	Bendintsu, Goenatxo eta Zelai
Telleria	Lasarte	35	71	1.69	Bere pisua bikoizten duen 140 kiloetako harriarekin 5 jasoaldi 3 minutuko txandan	175 kiloetako zilindroa eta 125 kiloetako bola, Goenatxo eta Zelai
Goikoetxea	Biriatu	39	115	1.78	1987an, 250, 263 eta 275 kiloetako koadroak leporatu zituen	200 kiloetako koadroa, Goenatxo eta Zelai

Koldo Alduntzin / Donostia.

IAZ EZ BEZALA, aurten bost harrijasotzaile ariko dira harri handietako txapelaren bila, eta hori, Elusukortak eta Sarasolak azken orduan esku hartzerik izan ez dutela. Izan ere, iaz soilik hiru harrijasotzaile aritu ziren Azkoitian, eta Izeta I.ak ez zuen bukatzerik izan. Horregatik, lau harri 25na kilo jaistea erabaki zuten. Horrek ahalbidetu du harrijasotzaile gehiago izatea.

Horrenbestez, Goenatxo, Zelai, Ostolaza, Goikoetxea eta Telleria plazaratuko dira eta Euskal Herriko Txapela izango dute jokoan Foruen enparantzan (12:00). Lau harriekin kilo gehien leporatzen duena izango da irabazlea. Iaz Goenatxok irabazi zuen bere zazpigarren txapela 27 jasoaldi eginda eta 5.025 kilo bizkarreratuta. Bigarren Ostolaza izan zen 1.150 kilo gutxiagorekin. Gaur, ordea, parekatuagoak izango dira indarrak.

Honako harri hauek erabiliko dituzte: 175 edo 200 kilotako koadroa, 175 edo 200 kilotako zilindroa, 150 kilotako kuboa eta 125 kilotako bola. Harrijasotzaileek erabaki beharko dute aurreneko bi harrien artean zein aukeratu. 200 kiloetako koadroa

aukeratzen badute, 175etako zilindroa erabiliko dute.

Juanjoxe Unanue, Goenatxo

Harri handiekin nagusi izan da azken zazpi urteotan. Azkoitiarrak 200 kilotako koadroarekin egingo du aldea, Zelaik lanak emango dizkiolako zilindroarekin. Herenegun heldu zen Nevadatik (EEBB) 10 eguneko bisitaldia eginda, eta ez du seriozki entrenatzerik izan. «Nire lana egitera plazaratuko naiz, baina nabaritutako dut harriekin kiloak kendu izana», zioen azkoitiarrak.

Joseba Ostolaza

Hiru urtez izan da txapeldunorde. Oreretan bizi den gaztearentzat ona izan da harriekin zama kentzea, baina aitortu du lan gehiago egin beharko dutela. Gustura aurkitzen da, eta lau harriekin moldatzen da berdintsu. Hirugarren postua ziurtatu nahi luke, eta harri txikietako txapelketan ere ariko da.

Joxeantonio Gisasola, Zelai

Garai batean jokatu zituen laupabost txapelketa harri handiekin, baina desberdinak zirenean.

«Ni ondo eta sasoi nago, baina kontrario handiak ditut», zioen bizkaitarrak. 200 kilotako koadroarekin gutxi jardun du azken 8 urteotan, eta horrekin izango ditu arazoak. Gainerakoekin ondo moldatuko da.

Joxe Goikoetxea

Lehen aldiz ariko da txapelketan, pare bat alditan izena eman zuen arren. «Harri kubikoarekin eta bolarekin gaizki moldatzen naiz, gehinetan koadroarekin jardun baitut», zioen lapurtarrak. Aian 290 kilotako koadroarekin marka egitera plazaratu zenean hanka hautsi zuen. «Lau harriekin gai naizela erakutsi nahi nioke neure buruari», gaineratu zuen.

Luismari Telleria

Lasartearra ez da inoiz aritu txapelketan, eta honela arrazoitu zigun partehartzea: «200 kilotako leporatzen banuen, esku hartuko nuela erabaki nuen, eta hala gertatu zen», adierazi zigun Luismarik. Bi urtez ezer egin gabe egon zen meniskoa hautsita, eta Goristidik animatu du. «Lau harriak altxatzera plazaratuko naiz», gaineratu zuen.

Sokatira

Nuarbe hautsa harrotzera 560 kilotako txapelari

■ Gaztedi atzetik izango du, eta hirugarren?

Koldo Alduntzin / Donostia

GOIHERRIKO San Cristobal auzoan, Bizkaian, emango dute Euskal Herriko lur gaineko txapelketaren lehen txapela, gaur jokatu baita 560 kilotako laugarren, eta azken jardunaldia. Arratsaldeko 5:00etan hasita, Goiherrin, Olaberrian eta Azkoitian indarrak neurtu zituzten bost taldeak ariko dira soka; hots, Nuarbe A eta B, Gaztedi, Getxo eta Goierri.

Jokatu diren Euskal Herriko Txapelketa guztietan bezala, Nuarbe A-k aukera ezin hobea du pisu honetako txapelari hautsa kendu eta berriro etxera eramateko, sailkapenburu baita 15 punturekin. Txapelketan zehar jokaturiko tiraldi guztiak bereganatu ditu, eta, gaur ere, gauza bera egiten ahaleginduko da, kiroltasunez lehiatzen bai baitakite gipuzkoarrek. Izan ere, txandaren bat galtzeak ondorioak izan ditzake gainerako postuak finkatzeko.

Bigarren postuan Laukizko Gaztedi da 12 punturekin, eta Nuarbe A-ri txapela kentzeko, lehen postuan sailkatu beharko luke gaur eta nuarbetarrak laugarren; eta hori kasik ezinezkoa da. Gainera, kitarakoa jokatu beharko lukete. Azkoitian jokaturiko hirugarren jardunaldian, izerdi asko isuri behar izan zuten laukiztarrek Goierri mendean hartzeko eta bigarren postuari tinko eusteko, baina aukera-aukeran dira iazko zilarrezko domina errepikatze.

560 eta 600 kilotan izan da aurtengo ikuskizun nagusia, betez ere 3. postua eskuratzen. Goierri lehia bizia izan du Gaztedirekin 560 kiloetan 2. postua kentzeko, baina ahalegin hori batzuetan garesti ordaindu du, gero galdu egin baitu Getxoren kontra, Goierri eta Azkoitian bezala.

Iaz Goierri sailkatu zen hirugarren postuan. Getxo 8 punturekin da eta Goierri 7rekin. Bisita da Getxok aukera hobea duela bere lehen txapela janzteko, baina oso garrantzitsuak izango dira elkarren kontra lehiatu aurreko tiraldiak. Zozketaren arabera, derrigor hartu beharko dute mendean Nuarbe B, eta zuhurtasunez jokatu beharko dute Nuarbe A eta Gaztediren kontra.

Goierri nahiko jota amaitu zuen joan den larunbatean Getxo-Faduran 600 kilotako jardunaldian, eta errekupeazio ahalmena garrantzitsua izango da. Arlo horretan, fisikoan alegia, baliteke Getxo hobetoago egotea. Gainera, irabaziz gero lehen domina lortuko lukete getxotarrek. Iaz Goierri eraman zuen brontzezkoa eta Getxo laugarren izan zen.

Bosgarren sailkatua Nuarbe B da 3 punturekin, eta kasik ezer egiterik ez duen arren, irabaztera joko du. Horregatik, uste baino bihurriago izango dute talde hau Getxok eta Goierri. Bestalde, txapeldunak Euskal Herria ordezkatzeko du Munduko Txapelketan. X



Getxo lehen domina lortzekotan da. Argazkian Olaberriko saioan.

KOLDO ALDUNTZIN



HAMALAU EUSKAL ZORTZIMILAKOAK

ADI!!!

Eskatu zure kioskoan HAMALAU EUSKAL ZORTZIMILAKOAK liburuaren faszikulu atzeratuak.

Egunkaria